

ԺԱՆՆԱ ԱՆՂՐԱՆԻԿԻ ՄԻՔԱՅԵԼՅԱՆ

(1946-2019)

Կյանքից հեռացավ ՀՀ ԳԱԱ Հ. Աճառյանի անվան լեզվի ինստիտուտի բարբառագիտության բաժնի վարիչի տեղակալ, բանասիրական գիտությունների թեկնածու Ժաննա Անդրանիկի Միքայելյանը:

Ժ. Միքայելյանը ծնվել է 1946 թվականի դեկտեմբերի 15-ին, Քանաքեռում: 1949 թվականից նրանց ընտանիքը տեղափոխվել է Գորիս: 1965 թվականին ավարտել է միջնակարգը և ընդունվել Երևանի Վ. Բրյուսովի անվան ռուսաց և օտար լեզուների ինստիտուտի ֆրանսիական բանասիրության բաժինը, որն ավարտել է 1969 թվականին: ՀՀ ԳԱԱ Հ. Աճառյանի անվան լեզվի ինստիտուտում աշխատել է 1977 թ. , բարբառագիտության բաժնում՝ 1979 թ., իսկ 2011 թ. բարբառագիտության բաժնի վարիչի տեղակալն էր:

2006 թվականին պաշտպանել է ատենախոսություն և ստացել բանասիրական գիտությունների թեկնածուի գիտական աստիճան: Նրա բազմամյա հետազոտությունների ամփոփումն էր «Վասպուրականի տարածքի բարբառները» (Ե., ՀՀ ԳԱԱ հրատ., 2009, 144 էջ) մենագրությունը, որում տարածքի քմային ձայնավորների գործառական ծագումնաբանական առանձնահատկությունների ուսումնասիրմամբ բացահայտել է բարբառային միավորների հնչյունական համակարգերի կազմավորման և զարգացման օրինաչափությունները: Հմուտ բարբառագետը հեղինակ է բազմաթիվ գիտական հոդվածների, որոշակի ներդրում ունի հայերենի բարբառագիտական ատլասի նյութերի հավաքման ծրագրով նախատեսված երեք տասնյակից ավելի բնակավայրերի խոսվածքների գրանցման գործում, տարիներ շարունակ ղեկավարում էր բարբառների համակարգչային թվայնացման աշխատանքները:

Ժ. Միքայելյանը հայրենասեր, շիտակ և ազնիվ քաղաքացի էր, մայրենի լեզվին և հայրենի մշակույթին կապված մտավորական: Հարազատ քրոջ՝ Մելադա Աղաբեկյանի և մյուս գործընկերների հետ մեծ ջանքեր էր ներդրել լեզվի ինստիտուտում «Ակունք» ազգագրական համույթի ստեղծմանը:

Նվիրյալ գործընկերոջ հիշատակը միշտ վառ կմնա նրան ճանաչողների, գործընկերների սրտերում: